



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

24.06.2022թ.

Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ԱՅ-ԼՕ-2022/39

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Ռ. Մկրտչյանի

Պատվիրատու՝ ՀՀ քաղաքաշինության կոմիտե
Բողոք բերող՝ «ՀԱԷԿ-ի շինարարություն» ՓԲԸ

Մասնակցությամբ՝
«ՀԱԷԿ-ի շինարարություն» ՓԲԸ-ի ներկայացուցիչ՝ Ա. Հովհաննիսյանի

Գնման ընթացակարգի ծածկագիրը և առարկան՝
«ՀՀՔԿ-ԲՄԱՇՁԲ-21/8» ծածկագրով բաց մրցույթ, հակակոռուպցիոն կոմիտեի շենքի
կառուցման աշխատանքների ձեռքբերում

ՀՀ գնումների հետ կապված բողոքներ քննող անձը (այսուհետ նաև՝ Բողոքներ
քննող անձ), ուսումնասիրելով Հայաստանի Հանրապետության ֆինանսների
նախարարության կողմից 31.01.2022թ.-ի թիվ 26/26-1/1572-2022 գրությամբ «ՀԱԷԿ-ի
շինարարություն» ՓԲԸ-ին (այսուհետ նաև՝ Մասնակից) գնումների գործընթացին
մասնակցելու իրավունք չունեցող մասնակիցների ցուցակում ներառելու նպատակով
նախաձեռնված ընթացակարգով ներկայացված հիմքերը,

Պ Ա Ր Ձ Ե Ց

1. Գործի նախապատմությունը.

«Հինանսների նախարարությունը, ՀՀ քաղաքաշինության կոմիտեի 24.01.2022թ.-ի թիվ 02/16.4/529-2022 գրության հիման վրա, 31.01.2022թ.-ին «ՀԱԷԿ-ի շինարարություն» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքերը:

Բողոքներ քննող անձին գործը մակագրվել է 31.01.2022թ.-ին:

01.02.2022թ.-ին www.gnumner.am կայքում հրապարակված հայտարարությամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ և տրվել է թիվ ՍՑ-ԼՕ-2022/39 համարի ծածկագիրը:

«ՀԱԷԿ-ի շինարարություն» ՓԲԸ-ն 24.01.2022թ.-ին հայցադիմում է ներկայացրել Երևան քաղաքի ընդհանուր իրավասության դատարան (այսուհետ նաև՝ Դատարան) ընդդեմ ՀՀ քաղաքաշինության կոմիտեի՝ գնահատող հանձնաժողովի արձանագրությունները մասնակի անվավեր ճանաչելու, ՀՀ քաղաքաշինության կոմիտեի գործողությունները ոչ իրավաչափ ճանաչելու պահանջի մասին:

Դատարանի 15.03.2022թ.-ի թիվ ԵԴ/3649/02/22 որոշմամբ հայցադիմումն ընդունվել է վարույթ:

Միաժամանակ Դատարանի կողմից 14.02.2022թ.-ին կայացվել է հայցի ապահովման միջոց կիրառելու մասին որոշում, այն է՝ հայցի ապահովման նպատակով արգելվել է ՀՀ գնումների հետ կապված բողոքներ քննող անձին ՍՑ-ԼՕ-2022/39 ընթացակարգով կատարելու որևէ գործողություն՝ «ՀԱԷԿ-ի շինարարություն» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով մինչև վերջնական դատական ակտի օրինական ուժի մեջ մտնելը:

Բողոքներ քննող անձի 17.02.2022թ.-ին կայացված թիվ ՍՑ-ԼՕ-2022/39 որոշմամբ ընթացակարգի քննությունը կասեցվել է՝ մինչև ԵԴ/3649/02/22 քաղաքացիական գործով վերջնական դատական ակտի կայացումը:

ՀՀ ԱՆ հարկադիր կատարումն ապահովող ծառայության կողմից 07.06.2022թ.-ին կայացվել է հարուցված կատարողական վարույթը կարճելու մասին որոշում, որով վերացվել

է Դատարանի կողմից 14.02.2022թ.-ին կայացված հայցի ապահովման միջոց կիրառելու մասին որոշումը:

Գործի վարույթը վերսկսվել է 08.06.2022թ.-ին և 17.06.2022թ.-ին նշանակվել և հրավիրվել է նիստ:

10.02.2022թ.-ին, 25.02.2022թ.-ին, 17.06.2022թ.-ին և 24.06.2022թ.-ին նշանակվել և հրավիրվել են նիստեր:

Գործի քննությունն ավարտվել է 17.06.2022թ.-ին և Բողոքներ քննող անձի որոշման հրապարակման օր է նշանակվել 24.06.2022թ.-ին:

2. ՀՀ քաղաքաշինության կոմիտեի ներկայացրած փաստերը և դիրքորոշումը.

ՀՀ քաղաքաշինության կոմիտեն 24.01.2022թ.-ի 02/16.4/529-2022 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«ՀՀ քաղաքաշինության կոմիտեի կողմից 2021 թվականի նոյեմբերի 18-ին հայտարարված ՀՀՔԿ-ԲՄԱՇՁԲ-21/8 ծածկագրով Հակակոռուպցիոն կոմիտեի շենքի կառուցման աշխատանքների ձեռքբերման գնման ընթացակարգին մասնակցության հայտ են ներկայացրել նաև «Տ-Քնսթրաքշն» և «ՀԱԷԿ-ի շինարարություն» փակ բաժնետիրական ընկերությունները, «Մեծն Էրիկ» սահմանափակ պարասխանավորությամբ ընկերությունը, «Բաղրամյանշին» բաց բաժնետիրական ընկերությունը (այսուհետ՝ Ընկերություններ):

ՀՀ կառավարության 2017 թվականի մայիսի 4-ի N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ Կարգ) 41-րդ կետի համաձայն Ընկերություններին ծանուցվել է մեկ աշխատանքային օրվա ընթացքում շտկել ներկայացված հայտերում արձանագրված անհամապարասխանությունները, ինչը վերջիններիս կողմից սահմանված ժամկետում ամբողջությամբ չի կատարվել:

Կարգի 42-րդ կետի համաձայն՝ Ընկերությունների հայտերը մերժվել են:»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացվել է «ՀՀՔԿ-ԲՄԱՇՁԲ-21/8» ծածկագրով հայտարարված գնման ընթացակարգի շրջանակներում «ՀԱԷԿ-ի շինարարություն» ՓԲԸ-ի տվյալները՝ համապատասխան հիմքերով:

3. «ԱԷԿ-ի շինարարություն» ՓԲԸ-ի ներկայացրած փաստարկները և դիրքորոշումը.

Բողոքներ քննող անձը 01.02.2022թ.-ի գրությամբ դիմել է «ԱԷԿ-ի շինարարություն» ՓԲԸ-ին՝ հնարավորություն տալով ՀՀ ֆինանսների նախարարության կողմից 31.01.2022թ.-ի թիվ 26/26-1/1572-2022 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը, ստանալով կարծիք հայտնելու վերաբերյալ գրությունը, ինչպես նաև ծանուցված լինելով հրավիրված նիստերի տեղի, օրվա և ժամի մասին, ներկայացել է հրավիրված նիստերին:

«ԱԷԿ-ի շինարարություն» ՓԲԸ-ն 03.02.2022թ.-ին ներկայացված դիրքորոշմամբ հայտնել է հետևյալը.

«Ստացել ենք հայտարարություն «ԱԷԿ-ի շինարարություն» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգի վերաբերյալ:

Նախաձեռնված ընթացակարգի ծածկագիրն է ՍՑ-ԼՕ-2022/39:

Գտնում ենք, որ ներկայացված դիմումը «ԱԷԿ-ի շինարարություն» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու համար անհիմն է, ըստի որ «ԱԷԿ-ի շինարարություն» ՓԲԸ-ի հայրը մերժվել է ապօրինի:

Սույնով տեղեկացնում ենք, որ 24.01.2022 թ-ին մեր կողմից Գնահատող հանձնաժողովի արձանագրությունները մասնակի անվավեր ճանաչելու, ՀՀ ընդհանրաշինության կոմիտեի գործողությունները ոչ իրավաչափ ճանաչելու պահանջի մասին բողոք է ներկայացվել Գնումների հետ կապված բողոքների քննող անձին:

25.01.2022 թ-ի Գնումների հետ կապված բողոքների քննող անձի հայտարարության հիման վրա 02.02.2022 թ-ին «ԱԷԿ-ի շինարարություն» ՓԲԸ-ի բողոքի քննության նպատակով հրավիրվել է նիստ, ոյը կայացել է և նշանակվել է ևս մեկ նիստ:

Միաժամանակ, Գնահատող հանձնաժողովի արձանագրությունները մասնակի անվավեր ճանաչելու, ՀՀ քաղաքաշինության կոմիտեի գործողությունները ոչ իրավաչափ ճանաչելու պահանջի մասին հայցադիմում ենք ներկայացվել Երևան քաղաքի ընդհանուր իրավասության դատարան:»:

Հիմք ընդունելով վերոգրյալը և հաշվի առնելով այն, որ վերը նշված արձանագրությունները կարող են անվավեր ճանաչվել, Մասնակիցը Բողոքներ քննող անձին խնդրել է կասեցնել ՀՀ Գնումների հետ կապված բողոքներ քննող անձի կողմից նախաձեռնված ՍՑ-ԼՕ-2022/39 ծածկագրով ընթացակարգը մինչև բողոքների քննության ավարտը:

4. ՍՑ-ԼՕ-2022/39 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. ՀՀ քաղաքաշինության կոմիտեի կողմից հակակոռուպցիոն կոմիտեի շենքի կառուցման աշխատանքներ ձեռքբերման նպատակով 18.11.2021թ.-ին հայտարարվել է «ՀՀԲԿ-ԲՄԱՇՁԲ-21/8» ծածկագրով բաց մրցույթ (այսուհետ նաև՝ Ընթացակարգ):

ii. Ընթացակարգին մասնակցելու նպատակով հայտ է ներկայացրել նաև «ՀԱԷԿ-ի շինարարություն» ՓԲԸ-ն:

iii. Ընթացակարգի գնահատող հանձնաժողովի (այսուհետ նաև՝ Հանձնաժողով) 13.01.2022թ.-ի նիստի թիվ 2-3 արձանագրության համաձայն՝ Հավելված թիվ 1.2-ի մասով «ՀԱԷԿ-ի շինարարություն» ՓԲԸ-ն 11-17-րդ, 17-ին հաջորդող տողով, 41-42-րդ, 81-82-րդ, 85-87-րդ և 89-97-րդ տողերով ներկայացված չեն մոդելները, իսկ 43-45-րդ, 64-65-րդ և 71-80-րդ տողերով տեխնիկական բնութագրերը ներկայացված են ոչ ամբողջական:

iv. Նույն արձանագրության համաձայն՝ Հանձնաժողովը որոշել է մեկ աշխատանքային օրով նիստը կասեցնել և մասնակիցներին առաջարկել ծանուցումը ստանալուց հետո մեկ աշխատանքային օրվա ընթացքում (14.01.2022թ. ներառյալ) շտկել արձանագրված անհամապատասխանությունները:

v. Հանձնաժողովի 19.01.2022թ.-ի նիստի թիվ 2-4 արձանագրության համաձայն՝ «ՀԱԷԿ-ի շինարարություն» ՓԲԸ-ի կողմից 11-17-րդ, 17-ին հաջորդող տողով, 41-42-րդ, 81-82-րդ, 85-87-րդ, 89-97-րդ տողերով ներկայացված չեն մոդելները:

vi. Նույն արձանագրության համաձայն՝ Հանձնաժողովը որոշել է Կարգի 42-րդ կետով սահմանված պահանջի հիման վրա «ՀԱԷԿ-ի շինարարություն» ՓԲ ընկերության հայտը մերժել:

vii. Ընթացակարգի շրջանակներում «ՀԱԷԿ-ի շինարարություն» ՓԲԸ-ի կողմից 24.01.2022թ.-ին ներկայացվել է բողոք:

viii. Գնումների հետ կապված բողոքներ քննող անձի 15.02.2022թ.-ին թիվ ԳԲՔԱ-ՆԳ-2022/12 ծածկագրով կայացրած որոշման համաձայն՝ Բողոքներ քննող անձը, արձանագրել է, որ ընթացակարգի գնահատող հանձնաժողովը 13.01.2022թ.-ի նիստի թիվ 2-3 արձանագրությամբ «Տ-Քնսթրաքշն» և «ՀԱԷԿ-ի շինարարություն» ՓԲ ընկերությունների կողմից հայտում՝ մոդելները չներկայացնելու հիմքով, արձանագրելով անհամապատասխանություններ հրավերով սահմանված պահանջների նկատմամբ, գործել է Կարգի 41-րդ կետով և Ընթացակարգի հրավերի 1-ին մասի 8-րդ կետի 8.9-րդ ենթակետով սահմանված պահանջների խախտմամբ, քանի որ Ընթացակարգի հրավերի 1-ին մասի 4-րդ կետի 4.3-րդ ենթակետի 4-րդ պարբերության և Ընթացակարգի հրավերի Հավելված թիվ 1.2-ի՝ սարքերի և սարքավորումների նկարագրի համաձայն՝ մասնակցի կողմից հայտով մոդելի ներկայացման պարտադիր պահանջ սահմանված չէ, այլ միայն սահմանվել է առկայության պարագայում, որպիսի պայմաններում Ընկերությունների կողմից հայտով մոդելների չներկայացնելը չի կարող ընթացակարգի գնահատող հանձնաժողովի կողմից Կարգի 41-րդ կետի համաձայն շտկման պահանջ ներկայացնելու հիմք հանդիսանալ, քանի որ Ընկերությունները տվյալ դեպքում թույլ չեն տվել հրավերով սահմանված պահանջի խախտում: Միևնույն ժամանակ, վերը նշված հիմնավորումներից ելնելով, Ընթացակարգի գնահատող հանձնաժողովը, 19.01.2022թ.-ի նիստի թիվ 2-4 արձանագրության 1.3-րդ կետով կայացված որոշմամբ Կարգի 42-րդ կետի համաձայն մերժելով «ՀԱԷԿ-ի շինարարություն» ՓԲԸ-ի հայտը՝ մոդելները չներկայացնելու հիմքով, իսկ «Տ-Քնսթրաքշն» ՓԲԸ-ի հայտը՝ այն հիմքով, որ վերջինիս կողմից շտկման արդյունքում 7-րդ, 9-րդ, 27-28-րդ, 30-33-րդ, 36-38-րդ և 96-րդ տողերով ներկայացված սարքավորումների մոդելները անձնագրային տեխնիկական բնութագրերով չեն համապատասխանում հրավերով սահմանված պահանջներին, գործել է ոչ իրավաչափ, քանի որ Ընթացակարգի գնահատող հանձնաժողովը տվյալ դեպքում Ընկերությունների կողմից հայտով ներկայացված Հավելված թիվ 1.2-ի՝ սարքերի և սարքավորումների նկարագրի գնահատումը հրավերով սահմանված պահանջների նկատմամբ ի սկզբանե պետք է իրականացնել Ընկերությունների կողմից մոդելների չներկայացման պայմաններում: Վերոգրյալով պայմանավորված՝ Բողոքներ քննող անձը որոշել է՝ «ՀԱԷԿ-ի շինարարություն» ՓԲԸ-ի համանման բողոքը բավարարել մասնակի: Պարտավորեցնել «ՀՀՔԿ-ԲՄԱՇՁԲ-21/8» ծածկագրով գնման ընթացակարգի գնահատող հանձնաժողովին «Տ-Քնսթրաքշն» և

«ԱԷԿ-ի շինարարություն» ՓԲ ընկերությունների ներկայացրած հայտերի մասով՝ դադարեցնելու 13.01.2022թ.-ին հրավիրված գնահատող հանձնաժողովի նիստի 2-3 արձանագրության 1.2 կետով՝ մոդելները ներկայացնելու պահանջը, մոդելները չներկայացնելու արդյունքում անհամապատասխանությունը չշտկված գնահատելու, որպես հետևանք՝ հայտը անբավարար գնահատելու և մերժելու մասով, անվավեր ճանաչել 19.01.2022թ. հրավիրված գնահատող հանձնաժողովի նիստի 2-4 արձանագրության 1.1 և 1.3 կետերը:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացության, որ ՀՀ ֆինանսների նախարարության կողմից 31.01.2022թ.-ի թիվ 26/26-1/1572-2022 գրությամբ «ԱԷԿ-ի շինարարություն» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է մերժման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 30-րդ հոդվածի 1-ին մասի համաձայն՝ մասնակիցը հայտը ներկայացնում է հրավերով սահմանված կարգով: Հայտը ներառում է մասնակցի հաստատած՝

1) հրավերի պահանջներին իր տվյալների համապատասխանության մասին հայտարարությունը.

2) գնային առաջարկը.

3) ոչ գնային առաջարկը (տեխնիկական առաջարկ կամ տեխնիկական բնութագիր), եթե հրավերով նախատեսված է:

4) հրավերով նախատեսված այլ փաստաթղթեր (տեղեկություններ):

Օրենքի 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 1-

ին ենթակետի համաձայն՝ հրավերով նախատեսվում է նաև, որ մասնակիցը հայտով ներկայացնում է՝

ա. գնման ընթացակարգին մասնակցելու գրավոր դիմում՝ նշելով էլեկտրոնային փոստի հասցեն, հարկ վճարողի հաշվառման համարը, գործունեության հասցեն և հեռախոսահամարը,

բ. իր կողմից հաստատված հավաստում՝ հրավերով սահմանված մասնակցության իրավունքի պահանջներին իր համապատասխանության մասին,

գ. ապրանքների գնման դեպքում իր կողմից առաջարկվող ապրանքի տեխնիկական բնութագրերը, իսկ հրավերով նախատեսված դեպքերում նաև առաջարկվող ապրանքի ապրանքային նշանը, ֆիրմային անվանումը, մակնիշը և արտադրողի անվանումը (այսուհետ՝ ապրանքի ամբողջական նկարագիր),

թ. «Իրավաբանական անձանց պետական գրանցման, իրավաբանական անձանց ստորաբաժանումների, հիմնարկների և անհատ ձեռնարկատերերի պետական հաշվառման մասին» Հայաստանի Հանրապետության օրենքի հիման վրա իրական շահառուների վերաբերյալ հայտարարագիր ներկայացնելու պարտականություն ունեցող իրավաբանական անձի դեպքում՝ հղում գնումների գործընթացին մասնակցող իրավաբանական անձի իրական շահառուների վերաբերյալ տեղեկություններ պարունակող կայքէջին, իսկ այլ իրավաբանական անձանց դեպքում՝ գնումների գործընթացին մասնակցող իրավաբանական անձի իրական շահառուների վերաբերյալ հայտարարագիր՝ «Իրավաբանական անձանց պետական գրանցման, իրավաբանական անձանց ստորաբաժանումների, հիմնարկների և անհատ ձեռնարկատերերի պետական հաշվառման մասին» Հայաստանի Հանրապետության օրենքի 60.3-րդ հոդվածի 6-րդ մասի հիման վրա սահմանված ձևով և կարգով: Ընդ որում, եթե մասնակիցը հայտարարվում է ընտրված մասնակից, ապա սույն պարբերությամբ նախատեսված տեղեկությունը պայմանագիր կնքելու որոշման մասին հայտարարության հետ միաժամանակ հրապարակվում է տեղեկագրում:

Նույն կետի 3-րդ ենթակետի «բ» պարբերության համաձայն՝ հրավերով նախատեսվում է նաև, որ շինարարական ծրագրերի գնման դեպքում մասնակիցը հայտով ներկայացնում է իր կողմից առաջարկվող՝ հրավերին կցված նախագծային փաստաթղթերով սահմանված տեխնիկական բնութագրերին համապատասխանող սարքերի և սարքավորումների տեխնիկական բնութագրերը, ապրանքային նշանները, ֆիրմային անվանումները, մակնիշները, արտադրողները և երաշխիքային ժամկետները:

Ընտրված մասնակցի հետ կնքվող պայմանագրի նախագծում ներառվում են վերջինիս կողմից հայտով ներկայացված սարքերը և սարքավորումները:

Կարգի 40-րդ կետի 4-րդ ենթակետի համաձայն՝ հայտերի բացման և գնահատման նիստում հանձնաժողովը մերժում է այն հայտերը, որոնցում բացակայում է գնային առաջարկը, կամ եթե այն ներկայացված է հրավերի պահանջներին անհամապատասխան, բացառությամբ սույն կարգի 41-րդ կետով նախատեսված դեպքի: Գնումն էլեկտրոնային համակարգով իրականացվելու դեպքում հիմք է ընդունվում համակարգում կցված՝ մասնակցի կողմից հաստատված գնային առաջարկը:

Կարգի 41-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ ներառյալ այն դեպքերը, երբ հայտում ներառված՝ Հայաստանի Հանրապետության ռեզիդենտ հանդիսացող մասնակցի կողմից հաստատված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը: Մասնակցին ուղարկվող ծանուցման մեջ մանրամասն նկարագրվում են հայտնաբերված անհամապատասխանությունները:

Կարգի 42-րդ կետի համաձայն՝ եթե սույն կարգի 41-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա նրա հայտը գնահատվում է բավարար: Հակառակ դեպքում տվյալ մասնակցի հայտը գնահատվում է անբավարար և մերժվում է, ներառյալ եթե մասնակիցը սույն կարգի 32-րդ կետի 1-ին մասի «դ» պարբերությամբ սահմանված ժամկետում չի ներկայացնում հայտի ապահովման բնօրինակը, իսկ ընտրված մասնակից է ճանաչվում հաջորդող տեղ զբաղեցրած մասնակիցը:

ՀՀ քաղաքաշինության կոմիտեի կողմից հակակոռուպցիոն կոմիտեի շենքի կառուցման աշխատանքներ ձեռքբերման նպատակով 18.11.2021թ.-ին հայտարարված «ՀՀՔԿ-ԲՄԱՇՁԲ-21/8» ծածկագրով գնման ընթացակարգի հրավերի (այսուհետ նաև՝ Հրավեր) 8.9-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, ներառյալ երբ

հայտում ներառված՝ Հայաստանի Հանրապետության ռեզիդենտ հանդիսացող մասնակցի կողմից հաստատված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին համակարգի միջոցով տեղեկացնում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Հրավերի 8.10-րդ կետի համաձայն՝ եթե սույն հրավերի 8.9-րդ կետով սահմանված ժամկետում մասնակիցը շտկում է արձանագրված անհամապատասխանությունը, ապա վերջինիս հայտը գնահատվում է բավարար: Հակառակ դեպքում տվյալ մասնակցի հայտը գնահատվում է անբավարար և մերժվում է, ներառյալ եթե մասնակիցը սույն հրավերով սահմանված ժամկետում չի ներկայացնում հայտի ապահովման բնօրինակը, իսկ ընտրված մասնակից է ճանաչվում հաջորդող տեղ զբաղեցրած մասնակիցը:

Վերոգրյալ հրավակարգավորումների լույսի ներքո՝ Բողոքներ քննող անձը փաստում է, որ մասնակիցը ներկայացնում է հրավերով սահմանված կարգով հայտ, որը ներառում է մասնակցի կողմից ներկայացված դիմում-հայտարարությունը, առաջարկվող ապրանքի ամբողջական նկարագիրը, գնային առաջարկը, հրավերով նախատեսված այլ փաստաթղթեր (տեղեկություններ): Ընդ որում, Կարգի 41-րդ կետը ուղղակիորեն սահմանում է արձանագրված անհամապատասխանությունը շտկելու անթույլատրելիություն հայտում ներառվող միայն գնային առաջարկի համար, այն էլ՝ որոշ բացառություններով: Սույն կետի իմաստից բխում է, որ մնացած բոլոր դեպքերում հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով տեղեկացնում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Հայտերի գնահատումն իրականացվում է հրավերով սահմանված կարգով և հրավերով նախատեսված պայմաններին չհամապատասխանող հայտերը գնահատվում են անբավարար և մերժվում են, ներառյալ եթե մասնակիցը մինչև հայտերի ներկայացման վերջնաժամկետը լրանալուն հաջորդող աշխատանքային օրվա Երևանի ժամանակով 17:00-ն գնահատող հանձնաժողովին չի ներկայացնում հայտի ապահովման բնօրինակը:

Բողոքներ քննող անձը հարկ է համարում նշել, որ օրենսդիրն իմպերատիվ կերպով սահմանել է, որ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ, բացառությամբ այն դեպքերի երբ

բացակայում է գնային առաջարկը կամ եթե վերջինս ներկայացված է հրավերի պահանջներին անհամապատասխան, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Սույն գործի փաստերի համաձայն՝ ՀՀ քաղաքաշինության կոմիտեի կողմից հակակոռուպցիոն կոմիտեի շենքի կառուցման աշխատանքներ ձեռքբերման նպատակով 18.11.2021թ.-ին հայտարարված «ՀՀԲԿ-ԲՄԱՇՁԲ-21/8» ծածկագրով բաց մրցույթի գնահատող հանձնաժողովի 13.01.2022թ.-ի նիստի թիվ 2-3 արձանագրությամբ արձանագրվել է, որ Հավելված թիվ 1.2-ի մասով «ՀԱԷԿ-ի շինարարություն» ՓԲԸ-ն 11-17-րդ, 17-ին հաջորդող տողով, 41-42-րդ, 81-82-րդ, 85-87-րդ և 89-97-րդ տողերով ներկայացված չեն մոդելները, իսկ 43-45-րդ, 64-65-րդ և 71-80-րդ տողերով տեխնիկական բնութագրերը ներկայացված են ոչ ամբողջական, ինչով պայմանավորված որոշում է կայացվել մեկ աշխատանքային օրով նիստը կասեցնել և մասնակիցներին առաջարկել ծանուցումը ստանալուց հետո մեկ աշխատանքային օրվա ընթացքում (14.01.2022թ. ներառյալ) շտկել արձանագրված անհամապատասխանությունները: Հանձնաժողովի 19.01.2022թ.-ի նիստի թիվ 2-4 արձանագրությամբ արձանագրվել է, որ «ՀԱԷԿ-ի շինարարություն» ՓԲԸ-ի կողմից 11-17-րդ, 17-ին հաջորդող տողով, 41-42-րդ, 81-82-րդ, 85-87-րդ, 89-97-րդ տողերով ներկայացված չեն մոդելները, ինչով պայմանավորված որոշում է կայացվել Կարգի 42-րդ կետով սահմանված պահանջի հիման վրա «ՀԱԷԿ-ի շինարարություն» ՓԲ ընկերության հայտը մերժել:

Ընթացակարգի շրջանակներում «ՀԱԷԿ-ի շինարարություն» ՓԲԸ-ի կողմից 24.01.2022թ.-ին ներկայացված բողոքը ՀՀ գնումների հետ կապված բողոքներ քննող անձի 15.02.2022թ.-ին թիվ ԳԲԲԱ-ՆԳ-2022/12 ծածկագրով կայացրած որոշմամբ բավարարվել է ամբողջությամբ և պարտավորեցվել է «ՀՀԲԿ-ԲՄԱՇՁԲ-21/8» ծածկագրով գնման ընթացակարգի գնահատող հանձնաժողովին «ՀԱԷԿ-ի շինարարություն» ՓԲ ընկերության ներկայացրած հայտի մասով դադարեցնելու 13.01.2022թ.-ի գնահատող հանձնաժողովի նիստի 2-3 արձանագրության մոդելները ներկայացնելու պահանջը, մոդելները չներկայացնելու արդյունքում անհամապատասխանությունը չշտկված գնահատելու, որպես հետևանք՝ հայտը անբավարար գնահատելու և մերժելու մասով, անվավեր ճանաչել 19.01.2022թ.-ի գնահատող հանձնաժողովի նիստի 2-4 արձանագրության 1.1 և 1.3 կետերը և դադարեցնել պայմանագիր կնքելու մասին որոշումը:

Օրենքի 6-րդ հոդվածի 1-ին մասի 6-րդ ենթակետի համաձայն՝ գնումների ընթացակարգերին մասնակցելու իրավունք չունեն այն անձինք՝ որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Նույն հոդվածի 2-րդ մասի համաձայն՝ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում: Տվյալ մասնակցի կարծիքը լսելուց հետո գնումների հետ կապված բողոքներ քննող անձը նույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին նույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Կարգի 32-րդ կետի 19-րդ ենթակետի համաձայն՝ հրավերով նախատեսվում է նաև, որ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Կարգի 45-րդ կետի համաձայն՝ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ

մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Նշված իրավանորմերի վերլուծությունից պետք է փաստել, որ օրենսդիրը մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու համար նախատեսել է սպառիչ պայմաններ, որոնք են պայմանագրով նախատեսված կամ գնման գործընթացի շրջանակում ստանձնած պարտավորությունների խախտումը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որպես ընտրված մասնակից պայմանագիր կնքելուց հրաժարվելը և հայտերը բացելուց հետո գնման գործընթացին հետագա մասնակցությունից հրաժարվելը: Միայն սույն դեպքերում է հնարավոր մասնակցին ներառել գնումների գործընթացին մասնակցելու իրավունք չունեցող մասնակիցների ցուցակում:

Բողոքներ քննող անձը փաստում է նաև, որ մասնակիցը պարտավոր է ներկայացնել հրավերով սահմանված պահանջներին համապատասխանող փաստաթղթեր (այսուհետ՝ Փաստաթղթեր): Եվ եթե Փաստաթղթերում արձանագրվում են անհամապատասխանություններ՝ հրավերի պահանջների նկատմամբ, իսկ մասնակիցը սահմանված ժամկետում չի շտկում արձանագրված անհամապատասխանությունները, ապա այդ հանգամանքը համարվում է որպես գնման գործընթացի շրջանակում ստանձնած պարտավորության խախտում: Նման դեպքում առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետի դրույթների կիրառման անխուսափելիությունը, քանի որ Մասնակիցն իր գործողություններով կամ անգործությամբ, խախտելով գնման գործընթացի շրջանակում ստանձնած պարտավորությունը, հանգեցնում է պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը:

Բողոքներ քննող անձը փաստում է նաև, որ օրենսդիրն որպես պարտավորությունը խախտելու համար պատասխանատվության պարտադիր պայման սահմանել է պարտավորությունը խախտած անձի մեղքի առկայությունը: Պարտապանը պարտավորությունը անպատշաճ կատարելու համար չի կարող կրել պատասխանատվություն՝ մեղքի բացակայության պայմաններում: Օրենքի 6-րդ հոդվածի 1-ին մասի 6-րդ կետի դրույթների կիրառման անխուսափելիությունն առաջանում է այն ժամանակ, երբ Մասնակիցն իր գործողություններով կամ անգործությամբ, խախտում է ընթացակարգի շրջանակներում ստանձնած որևէ պարտավորություն, որն էլ հանգեցնում է Պատվիրատուի կողմից գնման գործընթացին տվյալ մասնակցի հետագա մասնակցության

դադարեցմանը: Ուստի, այն դեպքերում, երբ բացակայում է պարտապանի մեղավորությունը, «Գնումների մասին» ՀՀ օրենքի 6-րդ հոդվածի 1-ին մասի 6-րդ կետում նշված պատասխանատվությունը չի կարող վրա հասնել ու հանգեցնել մասնակցի (պարտապանի)՝ գնումների գործընթացին մասնակցելու իրավունք չունեցող մասնակիցների ցուցակում ընդգրկելուն:

Վերոնշյալներով պայմանավորված՝ Բողոքներ քննող անձը գալիս է այն եզրահանգման, որ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետի դրույթների կիրառման անխուսափելիությունն առաջանում է այն ժամանակ, երբ Մասնակիցն իր գործողություններով կամ անգործությամբ, խախտում է գնման գործընթացի շրջանակում ստանձնած պարտավորությունը, որն էլ հանգեցնում է Պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը:

Վերոնշյալ իրավական նորմերի և փաստական հանգամանքների հիման վրա, դրանք համադրելով ՀՀ գնումների հետ կապված բողոքներ քննող անձի 15.02.2022թ.-ին թիվ ԳԲՔԱ-ՆԳ-2022/12 ծածկագրով կայացրած որոշմամբ հաստատված հանգամանքներին՝ Բողոքներ քննող անձն արձանագրում է, որ վերոնշյալ որոշմամբ պարտավորեցվել է «ՀՀԲԿ-ԲՄԱՇՁԲ-21/8» ծածկագրով գնման ընթացակարգի գնահատող հանձնաժողովին «ՀԱԷԿ-ի շինարարություն» ՓԲ ընկերության ներկայացրած հայտի մասով դադարեցնելու 13.01.2022թ.-ի գնահատող հանձնաժողովի նիստի 2-3 արձանագրության մոդելները ներկայացնելու պահանջը, մոդելները չներկայացնելու արդյունքում անհամապատասխանությունը չշտկված գնահատելու, որպես հետևանք՝ հայտը անբավարար գնահատելու և մերժելու մասով, անվավեր ճանաչել 19.01.2022թ.-ի գնահատող հանձնաժողովի նիստի 2-4 արձանագրության 1.1 և 1.3 կետերը և դադարեցնել պայմանագիր կնքելու մասին որոշումը, ինչով պայմանավորված վերանում է Մասնակցի կողմից գնման գործընթացի շրջանակում ստանձնած որևէ պարտավորության խախտում, որն էլ կհանգեցնեց օրենքի 6-րդ հոդվածի 1-ին մասի 6-րդ ենթակետի «ա» պարբերությամբ սահմանված դրույթների կիրառմանը:

Ավելին՝ Օրենքի 50-րդ հոդվածի 6-րդ մասի համաձայն՝ ... գնումների հետ կապված բողոքներ քննող անձի որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

ՀՀ Ֆինանսների նախարարի 06.12.2018թ.-ի թիվ 600-Ն «Գնումների հետ կապված բողոքներ քննող անձի գործունեության կարգը հաստատելու մասին» հրամանի 26-րդ կետի

համաձայն՝ Անձի որոշումն իրավապարտադիր է, որը կարող է փոփոխվել կամ վերացվել, այդ թվում մասնակի, միայն դատարանի կողմից:

Նույն հրամանի 27-րդ կետի համաձայն՝ գնումների հետ կապված բողոքներ քննող անձի կողմից ընդունված որոշումը ենթակա է անվերապահ կատարման, եթե այն դատական կարգով չի վերացվել:

Վերոնշյալ իրավական նորմերի և փաստական հանգամանքների հիման վրա՝ Բողոքներ քննող անձը գալիս է այն եզրահանգման, որ Անձի կայացրած և չվերացված որոշումն ունի համապարտադիր բնույթ, իսկ նախկինում քննված՝ չվերացված որոշմամբ հաստատված գործի քննության համար նշանակություն ունեցող փաստերը գործին մասնակցող նույն անձանց մասնակցությամբ այլ գործ քննելիս կրկին ապացուցման ենթակա չեն, դրանք այն փաստական տվյալներն են, որոնք հետազոտման և գնահատման ենթակա չեն և ունեն ապացուցողական ուժ:

Վերոնշյալներով պայմանավորված՝ Բողոքներ քննող անձը, հիմք ընդունելով ՀՀ գնումների հետ կապված բողոքներ քննող անձի 15.02.2022թ.-ին թիվ ԳԲԲԱ-ՆԳ-2022/12 ծածկագրով կայացրած իրավապարտադիր ուժ ունեցող որոշմամբ հաստատված փաստական հանգամանքները, արձանագրում է, որ Հանձնաժողովի կողմից «ՀԱԷԿ-ի շինարարություն» ՓԲԸ-ի հայտն անբավարար գնահատելու մասին կայացված որոշումն իրավաչափ չէ:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում՝ Բողոքներ քննող անձը հանգում է այն եզրակացության, որ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետում նշված պատասխանատվությունը չի կարող վրա հասնել ու հանգեցնել «ՀԱԷԿ-ի շինարարություն» ՓԲԸ-ին՝ գնումների գործընթացին մասնակցելու իրավունք չունեցող մասնակիցների ցուցակում ընդգրկելուն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը.

Ո Ր Ո Շ Ե Ց

ՀՀ ֆինանսների նախարարության կողմից 31.01.2022թ.-ի թիվ 26/26-1/1572-2022 գրությամբ «ՀԱԷԿ-ի շինարարություն» ՓԲԸ-ին գնումների գործընթացին մասնակցելու

իրավունք չունեցող մասնակիցների ցուցակում ներառելու նպատակով նախաձեռնված թիվ
ՍՑ-ԼՕ-2022/39 ծածկագրով ընթացակարգը մերժել:

ՀՀ գնումների հետ կապված բողոքներ քննող անձի ընդունած որոշումն ուժի մեջ է
մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն
իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն
դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ
ԲՈՂՈՔՆԵՐ ՔՆՆՈՂ ԱՆՁ՝**



ԼԵՎՈՆ ՕՇԱՆՅԱՆ